

Aruba Tourism Authority contento cu mercadonan nobo

Southwest Airlines ta importante como un balor añadi pa Aruba

ORANJESTAD (AAN): Aruba Tourism Authority (ATA) ta orguyoso y ta sinti su mes masha honra cu Southwest Airlines a scoge Aruba como su prome destinacion pafo di Merca. Aruba lo bira e prome di e tres destinacion no domestico, cu e aerolinea lo bula desde cu a funda e compania 43 aña pasa. E ocasion historico aki, tanto pa e aerolinea prestigioso aki como pa Aruba, ta wordo celebra riba diamars dia 1 di juli 2014 ora cu e prome vuelo internacional di Southwest Airlines lo sali for di Baltimore pa Aruba y ta yega pa 1'or di merdia.

Southwest Airlines a adkiri AirTran, cu tin ya cuater aña ta bula pa Aruba y asina ta tuma e vuelonan over, pero ta haciendo cambionan

importante, unda cu lo tin 715 stoel adicional pa siman disponibel pa Aruba. Airtran tin 4 aña ta bula pa Aruba y pa aña 2013 nan a trece un total di 58.638 pasaheronan Mericano pa nos destinacion, cual ta 10.54% di e marketshare di 2013 pa cu turistanan Mericano pa nos isla, segun cifranan di Aruba Tourism Authority.

Cu e vuelo inaugural, Southwest Airlines a expande su halanan pafo di e fronteranan di Merca y pa Aruba esaki ta traduci di 9 pa 15 vuelo pa siman; cu 7 vuelo semanal for di Orlando, 1 vuelo semanal for di Atlanta y 7 vuelo semanal for di Baltimore.

Ronella Tjin Asjoe-Croes, C.E.O. di Aruba Tourism Authority a subraya cu



e decision di Southwest Airlines y e partnership cu a wordo estableci ta hopi importante pa e strategia di ATA y su partnernan pa e diversificacion den e mercado Mericano. "Nos ta bay keda enfoca riba e parti di noordoost, pero entre otro nos ta bay mas intensivo cu nos actividadnan y inversionnan den otro partinan di Merca. Den cuadro di esaki si bo kier sigui cu e strategia di diversificacion logicamente bo mester zorg pa e parti di aviacion tambe ta na su luga," Tjin Asjoe-Croes a splica.

Aruba Tourism Authority hunto cu Aruba Airport Authority y otro socionan ta trahando for di masha tempo caba riba e posibilidad pa por haya Southwest Airlines bula pa Aruba, pero e tempo ey nan no tabata sali for di Merca ainda.

Ronella Tjin Asjoe-Croes a comenta, "Mi ta kere cu e adkision di Southwest Airlines ta pas perfecto den e cuadro aki y tambe sin kita cu nan conexiannan domestico ta un di esunnan mas amplio na Merca, pues e ta habri hopi

porta for di diferente skina di Merca. Southwest Airlines tin un base di clientela hopi leal y Aruba ta un di e prome destinacionnan internacional cu nan ta introduciendo."

Ronella Tjin Asjoe-Croes a remarca cu den cuadro di diversificacion den Merca y den cuadro di crece den e mercadonan nobo pa Aruba, esta amplia e base di esunnan cu un entrada di mas cu 150 mil dollar pa aña y sigui atrae segmentonan clave manera 'famia' y 'honeymooners', Southwest Airlines ta presenta oportunidadnan grandi pa Aruba sigui expande den e segmentonan di mercado importante aki. Historicamente Aruba tabata concentra riba y ta exitoso caba den e segmento unda cu e entrada di famia (household income) ta di 100 mil dollar of mas y awor ATA lo amplia e base aki sin lubida otro segmentonan clave.

"E ta mas sano pa tin un base mas amplio," e ehecutivo a expresa, añadiendo cu Southwest Airlines ta activo den e mercadonan cu ta interesante pa Aruba, unda

cu tin entre otro e bishitante potencial di un cierto nivel di entrada pa aña den e regionnan aki tambe."

For di su fundacion, Southwest Airlines a habri un niche nobo, unda cu nan a specialisa den bon servicio, den vuelonan cortico y a cuminsa ofrece e vuelonan aki cu un frecuencia mas halto. "Nos a lansa e low-fare revolution y nos a crece desde e tempo ey pa transporta mas pasahero den Merca cu cualkier otro aerolinea," Gary Kelly, CEO di Southwest a expresa den su mensahe pa luna di juni, e luna di celebracion di e di 43 aniversario di Southwest. Den e mensahe aki tambe, cu a sali riba e website di Southwest Airlines, Kelly ta anuncia e vuelonan pa Aruba, Bahamas y Jamaica, unda cu e ta subraya tambe cu e aerolinea tin e empleadonan di mas cariñoso na mundo.

Como e isla conoci pa e hendenan di mas cariñoso, Aruba ta contento di por brinda un caluroso bonbini na Southwest Airlines y tur e pasaheronan cu e aerolinea aki ta treciendo pa disfruta di nos hospitalidad.

E nivel di servicio y experiencia cu ta wordo ofrece di parti di Southwest Airlines ta pas tambe den e forma cu Aruba ta conduci y desaroya su industria di turismo.

Mientrastanto ta haciendo tur preparacion pa ricibi e prome vuelo di Southwest Airlines otro siman na Aruba.